

**KA E- IADAW MASI KA RONGBIRIA LEHKMEN KI  
LONGSHWA MANSHWA.**



**Da u M.M.Thaiang.**

**la ka hok longtrai la tyngkai da u Nongthoh..**



## SHIKYNTIEN NA U NONGTHOH.

Ka E-iadaw ne pyniatur masi kaba shisien shisnem ha ki katto katne tylli ki shnong ha Rilum Jaintia, hadien ba la dep ka bet ka thung kba lane ha shwa ban lum ban lang bad buh ha ki Thiar ki Tyllu, kam long kaei kaei kaba dangthymmai, hynrei kaba ju pynialeh da ki longshwa manshwa, da ki Pamen, ki Beimen jong ka jaitbynriew Pnar Jaintia naduh hyndai hynthai naduh myndanglung ka pyrthei mynba u Mawsiang, u Mawtha ki dangjem kum ka 'dewbilat kaba dang shu dep khleh. Lane naduh shwa ka por ban mih u Mawser, u Mawpylla mynba ki longshwa ki manshwa ki jong ngi ki dangthew khaw da u Khri ne da kaba shu kyndup da ka kti.

Ka E-iadaw ne pyniadaw-pyniatur masi kaba shisien shisnem ka dei kawei na ki jingialehkai kaba pynialeh da ki Masi Kyrtong ban pynkmen pynbyrngia ia ki nongshong shnong jong ka shnong, ka Raij ne ka Elaka. Ka E-iadaw masi ka long ka saindur ba la saindur iohi jngai jong ki longshwa manshwa bad kat kum ka sainpyrkhat jong ki ym tang ba ka long ka Rong Tamasa kaba shisngi ,ka long ruh ka lad ban tei ia ka imlang ka shlang, ka bha ka miat lyngba ka jingiakynduh paralok ia kiba ym shym la ia kynduh la kham slem.

Ka pyniadaw masi ka don arjait, kaba shu pyniadaw rong sngewbha bad kawei kaba don bynta bad ka Niam. Ha Takhniang bad Nongjingi, Elaka Nongjingi kaba don bynta bad ka niam ha shwa ki sngi ka pyniadaw masi ki da knia shwa uwei u Blang.

Ka E-iadaw ne pyniadaw masi kaba shisien shisnem hadien ba la dep ka bet ka thung kba, kaba la saindur da ki longshwa

manshwa ka dangneh dangskhem, dangphuh dangphieng kum  
kawei na ki rong tamasa lehkmen. Nga pynmih ia kane ka kot  
shaphang ka E-iadaw masi khnang ba ki longdien ki wandien kin  
nangpynneh pynskhem shuh shuh ha ki por ki ban dangwan.

Shri. M.M.Thaiang.

Mookyrdup, Jowai.

August 20/2014.

## **KA IADAW MASI KA RONG BIRIA LEHKMEN KI LONGSHWA MANSHWA.**

Naduh hyndai hynthai kulong kumah naduh ba danglung ka pyrthei ki Nongjaintia ki long ki briew kiba ieid ia ki jingialehkai ( Sports) naduh ki Rangbah, ki Samla haduh ki khynnah. Ha shwa ban mih ka jingialehkai ka juk mynta kum ka jingialehkai Bol, Kriket, Hocky, Badminton bad kiwei de ki jingialehkai. Ki jingialehkai kaba ki longshwa manshwa jong ka jaitbynriew ki sngewtynnat ban ialehkai bad pynkmen ia ki Nongpeitkai ka long kum ka “ Rahmookhrah, langiat-synrai, laringbhang, lapam-um, latan-tylle ( Tug of War), lasiat-thong ( Archery) laslait ( Wrestling), laphet-phari ( Race), lapuh Syiar ( Cock Fighting), Nohsakyryiat, lariah-kuku( Hide and seek), ladot-moo, lasiat Nup, lapdiah ia kynthir( Jump), ladat-dein, E-ladaw Muid bad ka E-ladaw Masi.

Baroh ki jingialehkai kiba la kdew haneng ki long ki jingialehkai kiba khring briew bad kiba pynkmen pynsngewbha ia ki nongpeitkai. Ha kane ka jingthoh yn iehnoh shwa ia kiba bun ki jingialehkai kiba ju ialeh ki longshwa manshwa bad yn shim shwa tang ia ka E-ladaw Masi ( Bull Fighting) Ka jingpyniadaw Masi rong ka don arjait , ka jingpyniadaw rong kaba khlem don jingiadei ne don bynta bad ka Niam bad kawei pat ka jingpyniadaw Masi rong ka iaide lang bad ka Niam.

Ha ka Elaka Raliang ka jingpyniadaw Masi rong kaba shisien shisnem ha Madan Pamsna kam don bynta eiei bad ka Niam wat lada ka don ka suit ka shor da ka 'kiad Um da u Klong u Skaw da u Doloi, u Pator, ki Wasan bad ki Rangbah shnong hagdeng madan pyniadaw ha shwa ban sdang ia ka pyniadaw ne pyniatur ia ki Masi Kyrtong. Kat kum ka jingiathuh u Doloi ka Elaka Raliang, Doloi C. Lyngdoh ha une u Nongthoh ha kane ka 26/7/2014 la ong ba wat lada pyndonkam ia ka “ Kyiad Pyrnah” ban suit ban shor shwa ban

sdang ka jingpyniadaw Masi pynban kam don bynta eiei bad ka Niam bad kam shym la don kano kano ka jinglum ia u Synniang u Bynhei na ki paidbah lane na ki trai Masi kyr tong kiba pynmih Kyr tong ki ban pyniadaw ha kum kane ka sngi.

Ka jingpyniadaw Masi rong ha ka Elaka Shangpung wat lada kam don bynta bad jingiadei eiei bad ka Niam, hynrei ka pher khyndiat na ka jingpyniadaw Masi rong jong ka Elaka Raliang. Ha Elaka Shangpung ha shwa ki sngi ka jingpyniadaw la don ka jinglum synniang da u Khaw lane da ka Pisa na ki trai Masi Kyr tong kiba don Masi Kyr tong ban pynmih ha ka sngi E-pyniadaw rong lane na kato ka Circle kaba don Masi Kyr tong ka ban pyniadaw. Haba ki la ioh ia u Khaw na kito ki trai Masi Kyr tong ne na kato ka Circle bad na uta u Khaw ki Shet Kyiad bad ia ka Kyiad kaba mih na kata kaba ki shet ki pdem la ainam ba ka dei ka “Kyiad pyrnah” ka la niew ba ka dei ka Kyiad khuid Jyiad kyntang bad da kane ka Kyiad ki suit ki shor ha Madan E-ladaw Masi shwa ban sdang ka jingpyniadaw ne pyniatur.

Ha Elaka Nangbah katba lah ban iohlum jingtip da une u Nongthoh na ki 'riew Rangbah bad ki riwshemphang jong ka shnong la ong ba ka jingpyniadaw Masi rong kaba shisien shisnem kam don bynta eiei bad ka Niam bad ka shu long beit ka jingpyniadaw Masi rong kaba pynkmen pynsngewbha ia ki nongshong shnong shisien shisnem hadien ba ki la dep ka bet ka thung ia u Khaw u Kba ha ki Hali ki pynthor jong ki bad kaba ym don kano kano ka jingsiew ne ka bairung ia ki Nongpeitkai kiba wan peit ia kane ka jingpyniadaw Masi.

Ka jingpyniadaw Masi rong ha shnong Mynsngat, Elaka u Doloi Nartiang ka long ka jingpyniadaw Masi kaba heh tam ha Rilum Jaintia ha kaba ym tang arhar lai har ne arjur lai jur ki Masi Kyr tong kiba iakhun, hynrei da ki bun jur ne bun har ki Masi. Hangne



U Doloĩ ka Elaka Raliang ma C. Lyngdoh u dang kren pdiang sngewbha la u Kongsan ma Thombor Shiwat CEM JHADC, la ki MDC, ki riewkhmat ka Thain bad ia ki paidbah kiba wan peitkai ha ka sngi E-iadaw Masi ha ka 26/7/2014, ha madan Pamsna Laskein, Elaka Raliang.

ruh ka jingpyniadaw ka shu long beit ka jingpyniadaw rong sngewbha kaba shisien shisnem hadien ba la dep ka bet ka thung bad ha shwa ban lum ban lang ia u Kba na ki Hali ki pynthor jong ki bad hangne ruh ka jingpyniadaw kam don bynta ne jingiadei eiei bad ka Niam.

Ha Elaka Nongjngi ha kaba kum kane ka jingpyniadaw Masi rong kaba shisien shisnem hadien ba la dep ka bet ka thung kba ka iaid lang ruh bad ka Niam. Ha Takhniang bad Nongjngi, Elaka Nongjngi ha shwa ki sngi pyniadaw Masi ki da knia uwei u Blang uba la jied kysai napdeng ki Blang.

Ki shnong kiba ju pynlong ia kane ka E-ladaw Masi rong kaba shisien shisnem ki long ha Madan Pamsna Laskein, Elaka Raliang, Umtyr-a Elaka Shangpung, Phramer Elaka Shangpung, Mynso Elaka Mynso, Takhniang-Nongjingi Elaka Nongjingi, Mukhla-Wahiajer bad Mihmyntdu Elaka Jowai. Ha baroh ki jaka la pynlong ia ka E-ladaw Masi ha kano kano ka sngi hadien ba la dep ka bet ka thung kba katba ha shnong Mihmyntdu pat ia kane ka jingpyniadaw Masi dei ban pynlong ha ka sngi kaba bud hadien ka shat niam Behdeinkhlam jong ka Raij Tuber. Ka E-ladaw ne pyniadaw Masi ka long kawei na ki jingialehkai (Sports) kaba ki longshwa manshwa ki pynialeh, pyniadaw ne pyniatur da ki Masi. Ka E-ladaw kaba shisien shisnem ka long beit beit ka jingpyniadaw rong sngewbha da ki trai Masi Kyrtong kaba khlem kano kano ka jinglum pisa na ki nongwan peitkai.

Ka sngi E-ladaw ne ka sngi pyniadaw Masi rong ka dei ka sngi jinglehkmen. Wat lada kam don bynta eiei bad ka Niam, hynrei shwa ban sdang ka jingpyniadaw la don hi ka suit ka shor da ka yiad khuid 'yiad kyntang, ka sneng ka kraw, ka kyntu ka kynpham na u Doloi, u Pator bad na ki 'riewshemphang, ki kyntien sneng kyntien kraw kiba khia thew ban bha ban miat ka longbriew man briew bad ki paidbah ki da sngap bad shahskhor da ka jingsngewrit

Ha ka pyniadaw Masi iathong pisa ym shym la pynlong tang shisien shisnem, hynrei kaba man la ka taiew lane kaba man la ka sngi. Ha kum kine ki jingpyniadaw wat lada ka don ka sneng ka kraw ka sneng ka kyntu ha shwa ban pyniadaw ne pyniatur hapdeng ki arliang mamla ba ym dei ban don kano kano ka lehbuit lehstad, lehmyntor lehmaya lane kano kano ka phrem ka slu (hapdeng ki trai Masi), hynrei pat kaba shongper bad shongkynrong bad kim suitniew shuh namar ba kim sngewmyntoi bad ki thaw lad thaw lynti, ki buit ki stad la ka liang ka liang ban jop bad ban ioh pisa.





Ki samla lud ha ka riam ka beit Muka-Dhara ha aka sngi iadaw  
Masi ha Madan Pamsna Laskein.

Ka jingpyniadaw Masi kaba shisien shisnem ym tang ba ka long ka rong biria bad ka Tamasa lehkmén, ka long ruh kawei na ki lad ban ia kynduh paralok iaki lok ne ia ki kur, ki kha kiba najan bad na jngai kiba la slem kim ju iakynduh shuh bad kaba pyniajan ia ki ha ka imlang ka sahang, ka tipkur tip jait, ka tipkha tipman, ka tiplok tip jor, ka tip kher tip mer, ka tip ratap tip rabi bad ka tip snem tip kynsi. ( Tip kynsai tip pangrai ne tip ratap tip rabi tip kong tip boo ong ki Pnar)

Ka pyniadaw Masi ka dei kawei na ki buit ba iohi jngai, ka bor pyrkhat, ka bor sngewthuh bad ka bor shemphang jong ki longshwa manshwa ym tang ba ka long ka rong biria Tamasa pynrbyrngia lehkmén kaba shisien shisnem ka wan rah ruh ia ka bha ka miat ha ka imlang kasahlang hapoh ka shnong ka thaw, ha ka Raij, ha ka Elaka bad ha ka jaitbynriew hi baroh kawei ha snieh pyrthei.

## **KA IADAW MASI KAWEI NA KI JINGIALEHKAI (SPORTS)**

Ka iadaw Masi ka long kawei na ki jingialehkai kaba pyniatur da ki Masi Kyrtong ban iadaw. Ka sei ka rong biria pynbyrngia lehkmien jong ki longshwa manshwa bad kaba dangiaibteng haduh



U ma Shanki Lyngdoh MDC u dang ai jingkren katba ki Kynrem ki Lyndang ka thain kiba kynthup ia u ma Bison Roy Iano MDC, ma Winning Garlan Sungoh MDC, ma Thombor Shiwat MDC (CEM JHADC) ma Paul Synnah SDO PHE, u Doloi Raliang ma C. Lyngdoh bad kiwei kiba dang shahskhor ia ka jingkren u ma Shanki.

kine ki sngi. Ka jingpyniadaw Masi ka long ka jingpyniatur uwei u masi kyrtong pyrshah ia uwei . La pynlong ia kane shisien shisnem hadien ba la dep ka bet ka thungkba. Ia kane ka E-ladaw Masi ym shym la pynlong ha baroh ki Elaka ka Rilum Jaintia, hynrei tang ha ki katto katne ki Elaka kata ha Elaka Raliang, Nangbah, Mynso, Nongjingi, Shiliang Myntang, Jowai bad Elaka Shangpung.

**Ka ladaw Masi ka dei ka rong tamasa lehkmen kaba shisngi bad ka ym don bynta eiei bad ka Niam. La katta ruh ha shnong Takhniang bad Nongjingi, Elaka Nongjingi ka laid lang bad ka Niam naba shwa ki sngi ka E-ladaw ki da knia uwei u Blang. Ka E-ladaw Masi ka dei kawei na ki jingialèhkai kaba pynialeh da kaba pyniatur ia ki masi Kyrtong. Ha ka sngi pyniadaw Masi ki 'riewrangbah, ki longkmie, ki samla bad ki khynnah na ki shnong bapher bapher najan bad na jngai ka Elaka bad nabar ki iabeh bha ban wan peitkai bad ban iohi dala ki khmat ia ka jingiatur, iadung, iasuh bad ia tynrah jong ki masi da ki reng kiba nep hir hir uwei pyrshah ia uwei.**

### **KA SNGI E-IADAW MASI KA SNGI PYNI RONG.**

**Ka sngi E-ladaw Masi ka dei ka sngi lehkmen bad ka sngi pyni-rong. Ki briew shynrang bad kynthei naduh ki Rangbah, ki Longkmie, ki Samla haduh ki Khynnah najan bad na jngai kim ju pep ban wan peitkai bad ka dei ka sngi pyni-rong ha ka riam ka beit. Ki Rangbah, ki Longkmie, ki Samla, ki Khynnah bad ki Tymmen ki Kro hala ki riam ki riam ne ki Jainphong ki riam ki beit bha. Kiba don kiba em ki riew Rangbah Jlis hala ka riam bad ka Jainsping Phali ne Muka. Ki longkmie, ki samla lud ha ka riam Ryndia, Muka, Thohsaru, Dhara bad ki jingdengkpieng ha ryndang bad dengkhadu ha ki kti. Ha ki por ba mynshwa, shwa ban mih kine ki jingsleh Pon bad sleh Powder ba bun jait, ha Khyllongsniuh ki tyngsat syntiew "SYNTU LATANGJOO" kaba sma iewbih kum ki Pon bad ki Powder ka juk mynta. Ki khynnah hala ki Jainphong ba bun rong hala ki rong ki rong. Ha ki por kiba kham mynshwa kiba duk ki bym biang ki Jain ki Nep ki da ia pan kyliang tang ban ioh deng iohphong ha kum kane ka sngi jinglehkmen.**

### **KA MADAN E –IADAW MASI KA IEWBAH IEWSAN.**


**Ha ka sngi pyniadaw Masi( pyniatur Masi) kaba shislen shisnem ka Madan kaba pynlong ia ka E –ladaw ka la long la kumka lewbah lewsan kaba heh.**

Ha baroh sawdong jong ka Madan la dap smam da ki Dukan Sha, ki Dukan Ja bad ha ki por kiba kham mynshwa kham sha kyndong ki briew ki die 'yiad Um, 'yiad thnam, ka Kyiad kaba mih na kaba ki nongshet ki PDEM ki PYOH na ka jyndem kyiad. ~~Ha~~ ka juk mynta ban lait na kano kano ka jingkren- sih krensang bad ka jingbun ktien ki buaid ki tanglang ia kane ka jingdie Kyiad be-ain bad die pathar la khang pyrshah ban die ha kum kane ka sngi rong lehkmien bad lada ki Nongpyniaid (Valunteers) ki lap ia ki Nongpynkhein ain ( die Kyiad) ki hap ha ka jingpynshitom kaba tynggeh bad ka kuna.

Ha ka juk mynta ban rat diengkhong ia kane ka jingdie Kyiad be-ain bad die pathar kumba leh ha ki snem kiba la leitnoh nalog ki Nongpyniaidkam jong ka E-ladaw Masi la nang iarap shuh shuh ban khang Kyiad da ki Pulit sorkar kiba dei peit ia ka tnat Exise.

Ha ka sngi E- ladaw ( pyniatu) Masi katba lah ban iohi da une u Nongthoh ha kane ka 26 July 2014, ha Madan Pamsna ( Laskein Elaka Raliang) la iohi ba katto katne ngut ki longkmie bad ki samla lud hala ka riam Tapmohkhlieh ki rah hala ki kti ia ki Shangsoh, Shangpai Shangwaidong, Shang Biri, Sikret, Shangkpu Mukruid, Kpu Langdong, Kpu Wasdain, Kpu Nai, Kpu Sla, Kpu Saru, Kpu Saburoi, Kpu Suwa, Tohja, Jashulia, Kpu Laha bad kiwei de ki jait kpu ba bun jait ( Kpu tyndur). Kine ki Nongdie ki iaied ki leng baroh shisngi ha baroh sawdong ka madan ban die jingdie.

Ha ki Dukan Sha bad Dukan Ja halor Mie j phriang ki Khuri, ki Pliang, ki Ketli, ki Shamoit, bad ki Khiewja Khiewdoh kiba dap smam da ka jadoh jalieh. Ha kine ki Dukan lah ban ioh ia ka Dohsniang, Dohsyiar, Dohkha, Pyllengsyiar, Dohjem, Dohkhleh, Dohsyrwa, Soh saw, Dhunia, Shatni, Sohkhia, Salat, Sohjew, Karot, Jamerdoh, Pudina bad kiwei de ki jait jhur khlaw kiba la tylliat bad buh bha hala ki plieng ki plieng.



U Chief Executive Member ka JHADC, ma Thombor Shiwat u Dang ai jingkren plie bad ka sneng ka kraw ha shwa ban sdang Ka E-iadaw masi ha Madan Pamsna 26/7/2014.

Ki brierw kiba kham don kham em, kiba riewspah, kiba ioh kiba la ki rung ki mih ki bam ki dih na kawei ka dukan sha kawei ka dukan bad ym don uwei ne kawei ki ban ym rung sha ki dukan Sha bad ki dukan Ja bad ha kine ki dukan smam shismam dap brierw baroh shisngi kiba rung kiba mih tat haduh ban dawai ka pyniadaw masi ba ki paidbah ki leitphai sha la ki shnong ki shnong.

Ha ki Raij bad ki Elaka kiba dang pynlong ia kane ka E -ladaw Masi rong kaba shisien shisnem ym tang ba ka long ka sngi kaba kmen ka long ruh ka sngi ban ia kynduh iala ki paralok kiba kim shym la ia kynduh la kham slem. Ka long shisha ka sngi kaba dap jingkmien ia ki paidbah ba ki iohi dala ki khmat ia ka jingiadaw ( iatur) jong ki Masi Kyrtong kiba la jied kysai napdeng ki Masi Kyrtong. Shuh shuh ki ioh ruh ia ka sneng ka kraw, ka sneng ka kyntu na u Doloi, u Pator, na ki riewshemphang, na ki prohjabieng bad na ki khraw pyrkhat kiba ktik ia ki jingmut jingpyrkhat jong ki paidbah ban bha ban miat ka longbrierw man brierw.

Ha kum kane ka sngi pyniadaw rong, ki Masi Kyrtong ki ban iakhun l kumba ki sngewthuh bha ba ha kin ia ia mih ha madan ym tang ban shu ia mih pyndep rukom ban pynkmen ia ki Nongpeitkai,

hynrei ka jingiatynjuh bor haba shit haba shai ha madan, ha khmat ka pyrthei ki Nongpeitkai mano uba khlainbor bad u ban rah ia ka nam jop (Champion). Ha kum kane ka sngi ki paidbah Nongpeitkai ki don ha ki lai kynhun. Ki ar kynhun kiba ieng pyneh daw la ka liang ka liang bad kawei pat ka kynhun ka bym iashah liang bad kaba shu iengpdeng. Ha kine ki ar kynhun ki don ruh kiba iathong bad iakop hala ka liang ka liang.



U Doloi Raliang ma C. Lyngdoh u dang bat ia u Klongsko "Kyiad Pynah", ka 'yiadkhuid 'yiad kyntang hadien ba la dep ka suit ka shor, ka nguiblei bad ka pan ka kyrpad na u Blei ban bha ban miat ka longbriew manbriew ha shwa ban sdang ka E-iadaw masi.

Ha ka Elaka Raliang bad Elaka Shangpung wat la ka E-iadaw Masi ka long ka pyniadaw rong kaba ym don bynta eiei ban ka Niam la katta ruh ha shwa ban sdang ka pyniadaw la don ka suit ka shor da ka Kyiad Um ia kaba la tip kum ka "PYRNAH" kaba la thep bha ha u Klongsoh. Da kane ka Kyisd Pynah u Doloi, u Pator, ki Rangbah shnong bad ki riawshemphang kiba la jied kiba pynlong ia kane ka

ka E-ladaw Masi. Ha ka juh ka por lyngba kane ka suit ka shor da u Klong da u Skaw ki pan ki thon ia ka jingkyrkhu kyrdoth na u Blei Nongbuh Nongthaw najrong na tbian ba un pynlong ia kane ka sngi kaba suk kaba kmen, kaba iaid beit iaid ryntih bad ban pyllait na kano kano ka jngma jingmysaw, na ka jingiakyroi, jingiakyntat bad na kano kano ka sniew ka smeh ha kane ka sngi bad ha ki sngi bad kip or ki ban dangwan. Ha kane ka suit ka shor ki kyrpad ia u Blei ba Un theh ki jingkyrkhu kyrdoth ia ki Nongshong shnong ka Elaka ba kin iashongsuk shongsain, ban tipbriew ban tipblei, ban koit ban khiah bad ban bha ban miat u Khaw u Kba ha ki Hali ki Pynthor jong ki.

Ha kane ka suit ka shor lada ka Kyiad ka tuid shar na rymmiang Klong sha khyndew, u Nongsuit u Nongshor u la sngewthuh shisyndon ba dang don kaei re kaei ka daw kaba dang dei ban leh ban pynsngewbha pynhun ia ka mon ka jong u Blei ne ki Blei. Lada ka Kyiad ba ki suit ka neh tden ha rymmiang Klong khlem hap sha khyndew, kiba ia don lang hangta ki ia risa shaw. Ka jingneh ka Kyiad ha rymmiang Klong ka mut ba u Blei, ki Blei ki pdianghun ia kaei kaei kaba u Nongsuit Nongshor u pan u thon na ka bynta ka bha ka miat uba bun u balang.

Ia kane ka thymmei sainpyrkhat la saindur da ki longshwa manshwa ban suit ban shor ban pan ka dak ka shin na ki Blei. Ka E-ladaw masi rong kam don bynta eiei bad ka Niam, hynrei da kaba leh kumne ka pynpaw pyrthei ba kum ka jaitbynriew Pnar Jaintia kum ka ka dustur shwa ban leh ia kano kano ka kam ki da pan hukum na u Blei na ki Blei. Ha ka juh ka por kat kum ka thymmei sainpyrkhat ki longshwa manshwa lah ban lait na ki para jingthaw bad ym lah lait pat na u Blei naba u Blei ka thymmei, ka tyllong bad ka tynrai jong ki jingbha baroh.

Na ka ud ka nam jong u Nongsuit Nongshor, ka E-iadaw masi kam don bynta eiei bad ka Niam, hynrei kaba khmit sha u Blei lyngba ka suit ka shor ha shwa ban sdang ka E-iadaw masi, kumj ka jaitbynriew Pnar Jaintia ka ioh ia ka burom ka ijot ha lpmat kiwei pat ki jaitbynriew ba ka long ka jaitbynriew kaba tipbriew tioblei bad kaba buh ia kiei kiei baroh hapoh ka jingpyniaid jong u Blei.



Ki khynnah kiba wan sha ka E-iadaw masi ha la ki riam ki riam bad ki Dukan kiba dap da ki Khiew ja Khiew doh, ki Khuri, ki Pliang, ki Shamoit, ki Ketli bad ki paidbah nongbam.

Hadien ka ainguh ka aidem bad ka pan ka thon jingkyrkhu kyrdo na u Blei na ki Blei, ki ai pat ia ka sneng ka kyntu ia ki trai Masi Kyrtong ba kin pyniadaw (pyniatur) iala ki Masi da ka jingkhuid mynsiem khlem kano kano ka lehbuit lehstad, ka leh Jadu ka leh Myntor bad khlem kano kano ka Phrem ka Slu. Na ka liang ki trai Masi Kyrtong ha ka jingiakren baroh arliang ki pdiang da kaba sngewrit ia ka sneng ka kyntu kaba ki la ioh bad kin pyniadaw (pyniatur) iala ki Masi ha ka hok bad da ka jingkhuid mynsiem. Haba la dep ka jingiakren, ki trai Masi baroh arliang ki leit t-r iala ki kyrtong bad beh ialam ia ki (Masi Kyrtong) shapoh madan ban sdang ia ka jingpyniadaw (pyniatur).

Shwa ban pynrung ia ki Masi hapoh madan, ki Nongpyniaidkam (Volunteers) ki iaed sawdong ka madan ban khang



( control) ia ki paidbah ba kim dei ban iatur shapdeng madan sha jan ki Masi Kyrtong laitnoh tang ki trai bad ki nongsharai jong ki kyrtong. Ki Masi haba ki iadaw uba rem u phet kulmar bad uba jop ruh u behthong wia wia ia uba rem. Ka jingkhang ia ki paidbah ban tur sha jan ki Masi ka long ka lad ban iada ia ki briew ban lait na kano kano ka jngmynsaw ha ka jingphet kulmar ki Masi Kyrtong.

Ki Nongsharai ki iehnoh ia ki Masi bhur bad beh ia u Kyrtong sha madan E iadaw. Ha madan baroh arliang ki trai kyrtong ki pyntur iala ki kyrtong kham shajan pyrshah uwei ia uwei pat. Ki Kyrtong haba ki iawan kham hajan ki sangeh shiphang arphang bad ia peit dom uwei ia uwei. Ha kane ka jingiasangeh jong ki kaba shiphang arphang ka long ka por ha kaba ki ia nujor iala ka rynieng ka ryniot mano uba kham heh met uba kham bha reng bad mano uban jop.

Hadien ka jingiasangeh kaba shiphang arphang ki kyrtong ki la sdang ban kyrhuh, peit mat dom uwei ia uwei, ki trud khyndew bad shut reng da kaba tong khyndew. Ha kane ka por ka long ka por ba ki shat ki khein mano ban jop bad mano ban rem. Haba la dep ka trud bad tong khyndew, ki pyndem la ki khlieh, ki iaid kynriang, ki pynieng la kit dong, pynkhun la u ryngdang ( Tymmiah ong ki Pnar) ki pynthiah la ki reng kiba la lit nep bha u trai bad ki sdang ban pyrsat uwei ia uwei.

Hamar kane ka por ki trai masi ki khynniat iala ki kyrtong ba kin ia kynrup. Tang mar shu ia jan ki kynrup thrait, ki kyrshan triang iala ki kti ki kjat ha khyndew bad iangiat uwei ia uwei. Ha kane ka iangiat bad sangah khlieh la riew ka jingsawa ba ia tyngkhuu ki reng sngew ba baroh arliang ki kyrtong kin khein kin kdiah ki reng jong ki.

Ha ka jingiatur ki kyrtong baroh arliang kim ailad uwei ia uwei ban ioh dung ioh tynrah. Kid a pyndonkam la ka buid ka bor

mar ia ngiat khlem da kynran dien. Kid a pyinkhih la u ryndang dapsah bad tynruh thrait na ka mon thrait na ka diang da ki reng kiba nep hir hir.

Ha ka jingialeh ym ju don kiba jop baroh arliang, hynrei don uba rem baddon uba jop. Don ki Masi kiba dukhi khait. Hateng hating u Kyrting uba kham tlotbor u phet bad u phaidien biang ban iakhun haduh ban da mihsnam bad mynsaw jur. Uba kham tlotbor u shah dung shah tynrah ha uba khlain bad kyllon ha madan. Haba kumne u trai masi uba shahrem u tur bad sympat ia uba khlain ba u kyrting uba tlot bad shahrem un ym iap ha madan. Ha kiba bun ki khep u kyrting uba shah rem um ju phaidien u phet ban lait im bad um khein briew shuh ia ki Nongpeitkai, u prong bad phet syllat naphang tang ban lait im.



Pamsna Ki Pulit pahara ha ka sngi E-iadaw masi kiba peitngor la ka jingdie Kyiad pathar be-ain bad ka madan E-iadaw Masi la kum ka lewbah lewsan ( Madan 26/7/14).

Ki paidbah tang shu iohsngew ba riew ki reng masi bad ka jingrisa ki paidbah ha madan, kiwei pat kiba don ha ki Dukan Sha, Dukan Jadoh, Jalieh bad kiba kham sha pajih ki iamih sha madan ha ka pyrta ka risa bad iashah ha la ka liang ka liang. Katba dang iadung iasuh ki Kyrtong katta ki paidbah ki la nang ia risabad ia pyrta kham jam.

#### JAW UMMAT KI KYNTHEI KIBA LUNG MYNSIEM.

Ki paidbah kiba iohi ia ka jingiakhun ki Masi Kyrtong ki nangpynjur ka jingiarisa bad katba nangiarisa khihwin ki Masi kyrtong pat kitai ha madan ki nangiakhyrwit thrait shithrait bad hateng hateng ki shu ia pyndei khlieh bad iapeit matdom uwei ia uwei, nangta ki ia khyrwit biang bad ia ngiat uwei ia uwei. Katba nangiaid ka por kitai ki nang ia tlotbor bad ki kjatdien kim nangkyrshan shuh bad uba tlotbor u kyllon bad shahdung haduh ban da dem khlop hajuh. Phlei ka snam uba shahdung kumba kynshait na Ktang.

Katba ki Masi Kyrtong ki dang iatynrah, iadung, iasuh ki shynrang briew ki nangpynjur ka halla ka risa, ki kynthei bapli pat kiba lung mynsiem ki lynniar bad jaw-ummat ban iohi ia ka jingiaum snam ki kyrtong bad pyrta briew ban pynkynriah bad pynkhlad ba kin ym ia iap ha madan. Ha kum kine ki jingpyniadaw rong ki paidbah ki ieng hala ka liang ka liang. Kiba ieng na ka liang uba jop ki risa kmen katba na ka liang uba rem ka kynjah jar.

Ha ka E- iadaw Masi rong kab shisien shisnem ym shym la pyniadaw ne pyniatur tang shijur arjur lane shihar arhar, hynrei da ki bun jur ne bun har ki kyrtong kiba wan ialam da ki shnong bapher bapher napoh ka Raij, napoh ka Elaka bad ka sdang naduh kynrong sngi haduh nohphaisngi bad haba bun tylli ki Masi ka kut haduh ban da kem iongrein.



Haba la wai ka E-iadow Masi wur pra u paidbah na Madan  
ban leit phai shala ki shnong ki shnong.

Ka sngi iadow masi ka long ka sngi ka jingkmnen, haba duna  
ki Masi kyrtong ban pyniadow, ki Nongpyniaid ka iadow Masi ki  
buh da ki programme jingialehkai bapher bapher ban pynbyrngia  
ia ki paidbah kum ka Jingiatan tylie ( Tug of War) ka laphet- phari  
( Race), ka laslait ( Wrestling) bad kiwei de ki jingialehkai kawei ka  
shnong pyrshah ia kawei.

Haba kut ka jingpyniadow Masi wur pra u paidbah ban  
leitphai sha la ki shnong ki shnong. La katta ruh ka jingiakren ia  
khana kam kut tang ha madan E-Idaw Masi, hynrei ki da ia parom  
da ki sngi bad da ki bnai ia kaei kaei kaba ki la iohi ha madan E-  
iadow Masi.

\*\*\*\*\*

## **HA KA SNGI E-IADAW MASI.**

**Ha ka sngi E=iadaw masi ,  
Ka waman chisien chisnem  
Wa ki lok warim,  
Sngiawsuk u iachem.**

**Hawa iachem chisien chisnem,  
Katwon wabih wabang,  
Ki lok warim thyme leh iachem.  
Chisien chisnem deilang.**

**U iachem chisien chisnem tohkhat,  
Wam sngiaw kwah de u iakhlad,  
Ia sngiawbha warngain para-I,  
Kam wapait iadaw Masi.**

**Ha ka sngi E-iadaw Masi,  
Da myllien lut yeitu yeini,  
Ki lok thyme leh iachem I,  
Ki lok warim leh kini.**

**Hawa iachem u ia parom ym pep,  
Ia I por katni yeiwa da dep,  
I por tymfang leh itu I por silet leh itu,  
Kymmoo yongdien wów rakhai suhsner suhkhu.**

**Ha ka sngi E-iadaw Masi,  
Ia ki lok warim wym iachem ki-ki,  
Hon lym iachem ki-ki,  
Nguh ki yow Blai wow kyrkhu ia ki.**

**Kut ka E-iadaw Masi,  
Ki paidbah leh pra-lut wet ki,  
To ialai suk iachem wan I,  
Ha kawi tewan ka E iadaw Masi.**





## **Da u juh u Nongthoh.**

- 1. *Ka History lyngkot ka Parish Khliehriat.***
- 2. *Ka Samla Labang.***
- 3. *The History of the People of the Labang-Nongphyllut and Pangam Raliang.***
- 4. *U Joseph bakhuid ka nuksa ba shynna ka jingim babha.***
- 5. *Ka Khanatang u Hynniewtrep kat kum ka sainpyrkhat ki Labang- Nongphyllut.***
- 6. *U Bishop Vincent Kympat.***
- 7. *Ka Pynhiar Synjat Lator bad ka shongkha shongman.***
- 8. *Satang ka jingjar lano yn suk.***
- 9. *Shano kan ialam.***
- 10. *Ka E-ladaw Masi ka rongbiria lehkmen ki longshwa manshwa.***

**\*\*\*\*\***